

## KARTA HEBREOWE'SX JÏI

*Dxusa' kwe'sxtxi we'wek txajx Nçxi'ka's kaahçxa*

<sup>1</sup> Dxusa' txãniitey kwe'sx yaçgawe'sxtxi maazkuêe uswa we'wek fxiyfxiyçxah txajx yuwee pta'sxsawe'sxtxi jxkaahçxa.

<sup>2</sup> Sa' ãçxh naa nmeh ensu' Dxusa' kwe'sxtxik we'we txajx Nçxi'ka's kaahçxa. Dxusa' txajx Nçxi'ka's jxkaahçxak naa kiwe kïjkïhnawa jxuka vxit. Txã'wê yüuçxak Dxusa' txãatxi's jxuka Nçxi'k kuseteçxaçxáa nvxiht.

<sup>3</sup> Txãa Nçxi'k iik Ney zhiçxkwe zmeena' kweet-hnisa yu', sa' Dxus ma'wêsate' le'çxkweçxáa yuhwa fxiysamée txãa íçxáak yu'. Sa' txãa íçxáa naa kiwe ma'k yuu nawa kïjkïhnawa jxuka ewçxáa kaafxi'ze'jna üsa' txajx we'weni yakhçxáa. Sa' txãa íçxáa kwe'sx pkaltxi yaateçxa Dxus pukate kaçxku cielute.

*Dxus Nçxi'ka' angeleswe'sxte thaakwe walasa'*

<sup>4</sup> Dxus Nçxi'ka' angeleswe'sxte thaakwek walasa yu', txãasak Ney üsni yase jxpa'ga maa angeleswe'sxtewa thaakwe walasa.

<sup>5</sup> Txã'wête íçxáak Dxusa' bagaçxte yuhwa angeleswe'sxtxi' maa yuhtxwa na'jïna we'wemée: Idxa' adx Nçxi'kgu, Txãa pa'gath itxi yuuwa'ja's ãçxha' vxit jïme'. Sa' txã'wêy maa angel yuhnawa na'wê we'weme': Adxa' txajx Ney yu'nja,

Aça' txã' adx Nçxi'k yuuna jĩme'.

<sup>6</sup> Nawa Dxusa' txajx Nçxi'ka's nyafxçxah naa kiwete nuykĩhçxa', na'wëk we'we:

Dxus angeleswe'sx jxukaysa txã'sçxáana nwëese'jwa'j ji'phta' jĩnak jxkaah.

<sup>7</sup> Sa' angeleswe'sx fxi'zewa'ja's yu' na'wëçxáak we'we:

Angeleswe'sxa' wejxa na'wë vxyaawa'jsa vxitnisata',

Sa' Dxus jxkaahnitx selpiina ipx beesa na'wë vxyaana yuuwa'jsa vxitnisata' jĩ'k.

<sup>8</sup> Nawa Nçxi'k fxi'zewa'ja's we'weçxa yu' na'jĩ'k: Dxus, iidx jxkaahna ũswa'ja' bagaçxtewa nes yuuna,

Idxa' ew yuuçxáa jxkaahna ũswa'jsag.

<sup>9</sup> Sa' ewmeesa yu'sa' jxpa'gamée, ewsa yuuçxá'sgu pakwe.

Txãa pa'gak iidx Dxusa' iidx wët fxi'zewa'ja's iiméh wala pees,

Naa kiwete iidx nwe'sxte jxthaakwe jĩ'k.

<sup>10</sup> Vxite ajkhë' na'jĩ'k Dxus Nçxi'ka's we'weçxa':

Idxgu kiwe's pheu'j nyafxte,

Sa' cieluwa iidx kuseju vxitnisata'.

<sup>11</sup> Nawa txã'wësa' pçuutxna, naapkaçxha' idxa' bagaçxtewa nes yuune'ga.

Kĩjkĩhwa jxuka ropa na'wëçxáa iisxixna.

<sup>12</sup> Aça' jxuka yu'pthehni yuutxna.

Nawa idx yu' bagaçxtewa txã'wëesa nes yuune'ga.

Iidx iłxi fxi'zeni' bagaçxte yuhwa pçumeena jĩ'k.

<sup>13</sup> Nawa Dxusa' maa angeleswe'sx yuhtxwa txã'wë yu' na'jĩna we'weme' bagaçxteçxáa yuhwa:

Adx pukate paçu ju'gte mkaaçx,  
 Idxna açesa maatxwa jxuka idxçxaçxáana  
 nwēese'jwa'ja's vxitna jxã'phkaçx jīme'.

14 Jxukay angeleswe'sxa' kwe'sx na'wē  
 kakwe ji'phmeesa naa kiwete maaçxah ewte  
 neeyūuwa'jsa ūstxna txāawe'sxtxi pu'çxya'  
 kaahnisaçxáata'.

## 2

*Ewte neeyūuwa'ja's jxpa'yajkxmée yu' yu-  
 uwa'jme'*

<sup>1</sup> Txāa pa'ga wala jxpa'yakxwa'j ji'ptha'w, na'wē  
 Dxus Nçxi'k yuu kwe'sxtxi we'wete yuwe ewsa's  
 wēse'tha'w txāajū txuteeya'mée.

<sup>2</sup> Dxus yuwe's angeleswe'sxçxáa pta'sxni  
 yuhwa īsxiini yuumée kxteyku yuu. Txāa  
 pa'gaiçxáatx nwēese'jmée pkalte wetesawe'sxa'  
 kastigāyni yuu txāawe'sx āhmée yūupa'ga.

<sup>3</sup> Txāaçxáa yuhwa kxteyku yuu, aç'a'  
 kwe'sx ewte neeyūuwa'j txakwe walasa's  
 Dxus Nçxi'k Kristo txajx yuweju yuuk pta'sx  
 txā'sa' jxpa'yakxmeeçxa', ¿ma'wē Dxus kastigo  
 seena'sajū iyukxtha'w? Aç'a' Kristo pta'sxni's  
 nyafxte wēse'jsawe'sxa' kwe'sxtxitx pta'sx,  
 isasa yuja' jīna.

<sup>4</sup> Txāawe'sxçxáa isasa yuja' jīmeeta', Dxus  
 yuuk isasa yuhna sūhna jiyukahna kim yuhwa  
 ājanimeesa's kaavxya'ja'j. Sa' Dxus Espir-  
 itu pu'çxte kīhte yuhwa sxiigmée selpiina  
 fxi'zewa'jtx ūsku teeçxsa na'wēçxah, txajx ūs  
 wēeni yu's jxuka.

*Jesukristo' kwe'sx yakh pxakhsa na'wēk yuu*

<sup>5</sup> Na'wē Kristoçxaçxá's nwēese'jwa'j en pa'jana jĩ'tha'w txãa ente jxkaahwa'ja's angeleswe'sxtxi nvxihtme' Dxusa'.

<sup>6</sup> Txã'wē meek yu' txajiiçxáak na'jĩna teeçx ajkhē pta'sxi' Dxus libroute:

Nasa' çma'wēsana açga txã'sa' peeygãja'?

Nasa pçuwa'jsaçxá's çkĩjxa'ga txakwe wala pa'pçxuna yaaki'?

<sup>7</sup> Nasa's maz en yu' angeleswe'sxte ãhmeekwesa na'wēg nvxiht,

Nawa jxthaakwe walasa yuuwa'j vxitçxag nvxiht,

Txã'wē yũuçxa iidx vxitnitxi' txãaçxaçxáa jxkaajxa' ãjawa'ja's ũsgu.

<sup>8</sup> Kĩhwa jxuka txãaçxaçxá's nwēese'jwa'ja's vxitgu jĩ'k.

Dxusa' txã'wē jxuka txãaçxaçxá's nwēese'jwa'ja's vxit yã'jçxa', kĩh yuhwa nwēese'jwa'jsamée yu' nvxihtme'. Txã'wētewa ãçxpkaçx txãaçxaçxá's kĩhwa jxuka nwēese'jni yu's iuymeetha'w.

<sup>9</sup> Na'wē maz en yu' angeleswe'sxte ãhmeekwesa vxitku txã' Jesusa' txã'snak Dxusa' kwe'sx jxukaysa pa'gate uuwa'jsa vxit. Nawa açxha' Dxus pukate u'pa', txãaçxaçxáa jxkaahwa'jsa yuuçxa txã'wē pxthaa yuuçxa uupa'ga.

<sup>10</sup> Kĩjkĩhnawa jxuka vxit-sa Dxusku txajx luuçx yuuwa'jsa yuutxi' jxuka nwe'weçxa txajx tasxte nuypa'jya' Jesukristo's pxthaa yuuçxa uuwa'j vxit, kĩhte yuhwa sxiigmée nwe'wesa yuukahn.

<sup>11</sup> Txã'wē pkaltxi peltunãynisa vxite' pkaltxi peltunãysa txãa yakh e'zsa' teeçx Neytewe'sxçxaçxáata' txãa Neya' Dxusa'. Txã'wē

teeçx Neytewe'sxçxáa ne'tka'w, txãa pa'gak Dzus Nçxi'ka' kwe'sxtxi's thaamemée Adx nyakh jĩna we'we'.

<sup>12</sup> Txã'snak Dzus librute na'jĩ':

Idx ma'wěsatewa adx nyakhwe'sxtxi pta'sxi'nja, Sa' adx nyakhwe'sx ksxavxyte idxa's weçxana tuuthe'je'nja jĩ'k.

<sup>13</sup> Sa' vxite ajkhēwa na'wěk we'we':

Adxa' Dzusçxáana yajkxna fxi'ze'nja.

Sa' ki'kin we'weçxa':

Dzus ũsni luuçx ayte ũsta' txãa yakh ayte ũsthu jĩ'k.

<sup>14</sup> Nasawa pxakhsa jĩnisa' maazkuēeçxawa kxazíi teeçx ney kakwe petx ee jxpa'gaçxa yuuçxáatx pxakhsa yu', txãa pa'gak Jesuswa pxakhsa yuuya' nasaa kakwe's jxpa'ga uuya' ājaya'. Txã'wě yũuçxak kluuste uuçxa uuwa'j vxit-sa's knay. Txã'wě nasatx uuwa'j vxit-sa' eçxthē'kh yu'.

<sup>15</sup> Txã'wě yũuçxak Jesusa' jxukaysatx nwe'we bagaçxtewa uuwa'ja's ũukhna yuuçxáa fxi'zenijũ.

<sup>16</sup> Txã' angeleswe'sxtxi pu'çxya' kīhme', wejxwa nasa Abrahan ji'jtxku pu'çxya' kīh.

<sup>17</sup> Txã'wě nasatx pu'çxya' ājaya'k kwe'sx na'wěsa yuu kīhtewa jxuka. Txãasak nyakh na'wě yuuna pa'jçxa kwe'sxtxi peeygāawa'ja's ji'phuçxa pkalsawe'sx pa'gate Dzus tasxte we'wewa'jsa yuu. Sa' nasaa pkaltxi jxuka peltunāyya'k pxthaa yuuçxa uuwa'j ji'phuna ũsu'.

<sup>18</sup> Txã'wě nasaa kakwe's jxpa'gaçxak pkalte kwe'sx çxhãçxhamée fxi'zeni's jxuka jiyu.

Txãasa âçxha' pkalte çxhãçxhamée fxi'zesatxi's kîhte yuhwa sxiigmée nwe'weya' âjawa'jsa'.

### 3

#### *Jesusçxáa Moieste thaakwesa'*

<sup>1</sup> Yakhthê'jwe'sx i'kwe'sxa' Dxus pa'yanisa i'kwe yuu txãa jïi yuuwa'jsa, txãa pa'ga wala ew mjiyuwe Kristo Jesusa's. Txã' Dxus kaahnisa', pkalsawe'sx pa'gate Dxus tasxte we'wewa'jsa, sa' Dxus yakh kwe'sx fxi'zewa'ja's pta'sxsa'.

<sup>2</sup> Jesusa' kîhtewa jxuka kxtey yuuk ma'wê yûuwa'ja's ne' Dxus jxkaah txã'sa' jxuka. Moiseswa ma'wêga Dxus luuçxtxi jxpe'jwa'ja's jxuka kxtey yuu, txã'wêyku Jesuswa kxtey yuu.

<sup>3</sup> Nawa Jesusçxáa Moieste thaakwe jxtuhthesa', ma'wêga yat namuçxáa jxtuhthe yu' açá' yatte selpiisáa yu' jxtuhthe meek yu', txã'wêy Jesusçxáa jxtuhthesa'.

<sup>4</sup> Yata's kimçxáawa txahte yujk yat yuuna pa'ja', nawa namu yu' Dxusa'.

<sup>5</sup> Moisesa' selpiisaaçxáaçxawa txã'wêk kîhte yuhwa peejxmée jxuka kxtey yuu Dxus luuçxtxi jxpe'jna, nawa txajx selpiini yu' e'su Dxus kîh yûuya'watewa txãatx kaajiyu'jsaçxáak yu'.

<sup>6</sup> Naapkaçxha' Kristo' selpiisamée Dxus Nçxi'k yuuk yu', txãasa Dxus luuçxa' kwe'sxtha'w txãatx kîhte yuhwa peejxmée jxpe'jwa'jsa', kwe'sx yuu uu entepkaçx txutemée txã's yuuçxáa weçxana fxi'zete yu'.

#### *Dxus luuçx, Dxus tasxte jxkaasena ũswa'j*

<sup>7</sup> Txãa pa'ga txãa yakhçxáa fxi'zewa'ja's na'wêk pta'sxi' Dxus Espiritu':

Ãçxh Dxus we'weni's wëse'jyã'jçxa',

<sup>8</sup> I'kwe'sx ũuste wa'l yaakxnuwe. I'kwe'sx yaçgawe'sxwa na'wëtx wa'lna ũusu' txã'wë yũunuwe.

Txã'wë wa'lçxa txãawe'sxa' Dxusa's kvxissatx na'wë yuu nasa u'pnimée kiwete.

<sup>9</sup> I'kwe'sx yaçgawe'sxa' kxtee ũsçxa',

Txakwe kuarenta anxupkaçx txãawe'sxtxi adx kïjkïhtewa ew yũuna pu'çxni's uyçxawa,

Adxa's wa'ltxi.

<sup>10</sup> Txãa pa'gath txãa nasa yakh wët fxi'zeyã' ãjameeçxa na'jïna we'we:

Adx kaapiya'jni's wa'lçxa, txãawe'sx ũuste jx-pubanaçxáatx fxi'ze'.

<sup>11</sup> Aça' txã'wë yũupa'ga, txãawe'sxa' adx yakh jxkaasena ũswa'the u'kameetxna jïnath jurã yjï'k.

<sup>12</sup> Txãa pa'ga, yakthë'jwe'sx, wala mpa'yajkxwe, txã'wë Dxus we'weni' weh yuhwa isameesana sũhna ewmée yajkçxa Dxus ïtxisa tasxu txuteya'mée.

<sup>13</sup> Txã'wë yũumée, jweeíçxáa çxhãçxha yaakxwa'ja's een isa puutx pu'çxna mfxi'zewe, kxah i'kwe'sxtxi' maa yuhtxwa pkala' kaypuba'jmeena, aça' i'kwe'sx ũuste ewmée yaakxwa'ja's jï'phumeene'kwe.

<sup>14</sup> Nyafxíwa ma'wëtkã'w Kristo yakh jx-pubamée fxi'ze txã'wëesa nmeh entepkaçx fxi'zeçxa', txãa yakh ũswa'ja's jï'phu'nja'w.

<sup>15</sup> Txã'wë wa'lkahmen na'wëk we'we':

Ãçxh Dxus we'weni's wëse'jyã'jçxa',

I'kwe'sx ũuste wa'l yaakxnuwe. I'kwe'sx yaçgawe'sxwa na'wētx wa'lna ũsu' txã'wē yūunuwe jī'k.

16 ¿Kimta txã'wē Dxus yuwe's wēse'jçxawa e'su yã'ja' wa'lna ũsu'? Egipto kiwejū Moises kutxi'kh txãawe'sx jxukaysatx txã'wē yūu.

17 Dxusa' ¿kim yakhga kuarenta anxupkaçx pxūuskwete fxi'zena ũsu'? Pkalte wetepa'ga nasa u'pnimée kiwete uutx txãawe'sx yakhku txã'wē pxūuskwete fxi'zena ũsu'.

18 Dxusa' ¿kimtxiga txã'wē adx yakh jxkaasena ũsya' u'kameetxna jīna we'we? Nwēese'jsameetxku txã'jīna we'we.

19 Dxus we'weni's nwēese'jmeeçxa', u'kaya' ajameeta' txã'sa' açxha' jiyutha'w.

## 4

1 Txãa pa'ga wala jxpa'yakiga. Txã'wēme', i'kwe'sxwa maaíi yu' ivxiituwá'kwe Dxus yakh jxkaasena ũswa'the pa'jwa'ja's ji'phçxawa.

2 Txãawe'sxtxiwa ma'wēga jxkaasena ũswa'the pa'jwa'ja's pta'sxni yuu, txã'wēy kwe'sxtxiwa pta'sxnik yuu Dxus yuwe ewte nvxiitwa'ja's. Nawa txãawe'sxtxi' txãa pta'sxni' selpiime', Dxus yuwe' isa kxtey yuuwa'jsana sūhna ũsuh jxuka nwēese'jmeeta' naa pa'ga.

3 Dxus we'weçxa: Adx yakh jxkaasena ũswa'the u'kameetxna jīna jurāyku. Nawa kwe'sx yu' pejka u'kawa'jsatha'w, Dxus yuwe' isa yuhna sūhnatha'w jxpa'gaçxa nwēese'j naa pa'ga. Na'wē adx yakh jxkaasena ũswa'j jīna we'wek txãa yu' nyafxiitey naa kiwe's vxitna



jxã'jçxa jxkaasek, sa' ãçxpajwa jxkaasena ũsa' kxte u'kawa'ja's we'weçxak txã'jĩ'.

<sup>4</sup> Txajx mjĩia's vxitna jxã'jçxa jxkaaseni's Dxus libroute na'jĩnak we'we':

Dxusa' txajx mjĩia's jxuka jxã'jçxa', siete ensa's jxkaasek jĩ'k.

<sup>5</sup> Sa' kxte txajx jxkaaseni's we'weçxak:

Adx yakh jxkaaseya' u'kaya' ajameetxna jĩ'.

<sup>6</sup> Makwe txã'wētewa, maaíi yu' kxtee jxkaasena ũswa'the u'katxna. Nyafxiiwe'sxa' ewte neeyũuwa'ja's pta'sxte wēse'jçxawa, Dxusa's nwēese'jmeeçxa jxkaasena ũswa'the u'kameeta'.

<sup>7</sup> Txã'wē yũuni en skhēwniijũ wala txaçxtek Dxusa' Davxida's na'jĩna kwe'we'j:

Ãçxh Dxus we'weni's wēse'jyã'jçxa',

Wa'lna nwēese'jmée yu' yuunuwe jĩ'k.

Txãa yu' ãçxh naa ensuwe'sxwa txã'wēy yũuwe'sxtek txã'jĩ'.

<sup>8</sup> Jxkaasewa'j jĩna we'we'k txãa jxkaasewa'ja' Joswé entewe'sxwaça', Dxusa' e'su txaçxte ki' we'wewa'jmeene' yu' ãçxh jĩna.

<sup>9</sup> Txãa pa'ga jxkaasewa'j thaakwe ewsa nee ũsíçxá' Dxusa's nwēese'jsawe'sx jĩi.

<sup>10</sup> Txãa pa'gatey Dxus yakh jxkaasewa'the u'kasa' txãawe'sx mjĩiniijũ jxukatek jxkaase', Dxuswa ma'wēga txajx mjĩini's jxã'jçxa jxukate jxkaase txã'wēy.

<sup>11</sup> Txãasa Dxus yakh jxkaasewa'the u'kaya' pa'pçxuwa'j ji'ptha'w, Dxus we'weni's nwēese'jmeeta' txãawe'sx na'wē yũumée.

<sup>12</sup> Txã'wēme', Dxus we'weni' itxisa', kīhtewa jxuka seelpisa. Dxus we'weni' kçxilx pdxi'p

seena' zeksate jxthaakwe zeksa', txãasak ũus dxiite kîh pkal ji'phtewa jxuka ãate kpa-jkxwe'we'. Sa' ũusteçxáa yaakxni kîh yuhnawa paaçte nvxiitu'çme'.

<sup>13</sup> Dxus vxitnisa' kîh yuhwa txajx dxi'pte paaçte uynimeete yu' neeyũumeetxna. Kîjkîhwa jxuka ãateçxaçxáa ũsta' kwe'sxtxi kastigãywa'jsa ũsa' txajx dxi'pte.

*Dxus tasxte pkalsawe'sx ju'gu we'we pu'çxsa' Jesusa'*

<sup>14</sup> Dxus Nçxi'k Jesus txã'wẽ Dxus tasxte kwe'sx pkalsawe'sx ju'gu we'we pu'çxwa'jsa cielute u'kak, txãa pa'ga txajx tasxuh txutemée fxi'zega.

<sup>15</sup> Txãa pa'gatey cielute kwe'sx ju'gu yu-usa' txãa yu' pkalte yu' wetemeeçxawa, pkalte kwe'sx çxhãçxhamée fxi'zeni yu'sa' jxuka jiyuk, txãasa kwe'sx ãhmeeekwesatx jxuka peeygãhna pu'çxwa'jsa'.

<sup>16</sup> Txãa pa'ga Dxus tasxte ũukhmée utx-aaga, Dxus peeygãani's ji'phuçxa kwe'sx thëyte fxi'zenijũ nwe'weni yuuya' kîh entewa.

## 5

<sup>1</sup> Pkalsawe'sx ju'gu we'we pu'çxwa'jsa tx-hitxçxa naa kiwete nvxiitnisa' txãa îiçxáa pkalpa'ga tajkx ikhçxa Dxus altalte kabwa'jsa'.

<sup>2</sup> Pkalsawe'sx ju'gu we'we pu'çxsa' txãa íiwa pkalte nxuste fxi'zesaçxa', nxuste fxi'zeni ma'wëtewa jxuka jiia'. Txãasa jiimeekwesa vxituna fxi'zesatx wala peeygãhna ju'gu yuuwa'jsa'.

<sup>3</sup> Sa' txãa íiwa ãhmeekwe pkalsaçxa', peekx pkalpa'gawa tajkx ikhçxa Dxus altaíte kabwa'j ji'phu'k, vxitesa pa'gatewa txã'wëy.

<sup>4</sup> Pkalsawe'sx ju'gu we'we pu'çxwa'jsa' nasaa pwe'sxçxáa yajkxçxa ki'pnisa yu'çmeeta'. Txãawe'sxtxi' Dxusku txhitxhçxa nvxiitu', Aaronwa ma'wëga Dxus txhitxhnisa yuu txã'wëy.

<sup>5</sup> Aça' Kristowa txã'wëy yũunisaíçxáak yuu. Txã' peekxçxáa yu' pkalsawe'sx ju'gu Dxus tasxte we'wesa yuume'. Txã'sa' Dxusku txhitxhçxa nvxiht. Txajíik Dxus librutewa na'jĩ':

Dxus we'weçxa':

Idxa' adx Nçxi'kgu,

Txãa pa'gath ítxi yuuwa'ja's ãçxha' ũs jĩnak we'we'.

<sup>6</sup> Sa' vxite ajkhëwa Dxus librute na'jĩnak we'weni yuu:

Idxa' pkalsawe'sx ju'gu Dxus tasxte we'we pu'çxwa'jsag bagaçxtewa,

Melkisedekwa ma'wëga yuu txã'wëysa jĩ'k.

<sup>7</sup> Kristo' naa kiwete ũççxa', txajx uuwa'j en jxuka utxaaçte', Dxus nwe'weya' ãjawa'jsa dxi'pte wala pxthaa sus neewe'wek ũ'nena, aça' Dxusa' wëse'kh txajx pxthaa we'weni's.

<sup>8</sup> Kristo' makwe Dxus Nçxi'kçxawa, iiméh wala pxthaa yuuwa'ja's jiyuçxa, nwëese'jwa'ja'swa piyak.

<sup>9</sup> Txã'wë kíh pxthaa yuunisatewa jxuka jiyuna jxã'jçxak, bagaçxtewa nwe'wena nes yuuwa'jsa yuuna pa'j jxukaysa nwëese'jsa yuutxi's.

<sup>10</sup> Txã'wë yũunijũk Dxusa' pkalsawe'sx ju'gu we'we pu'çxwa'jsa vxit, Melkisedek na'wëysa.

*Dxusa's jiiçxa txajũ txuteete' ũukhũukhsa'*

11 Na'wē pta'sxi'th txã'sa' wala we'wewa'j ji'phúixáath, nawa i'kwe'sxa' jiyuya' āja'çmeei'kwe, açã' wala thēya' ew pta'sx wēete yu'.

12 Dxusa's jiyuni txakwe txaçxte', i'kwe'sx yuu kaapiya'jsa yuupkaçxte, nee peejiiçxáa i'kwe Dxus kaapiya'jni thēymeekwesa's ki' peena ew pta'sxwa'j. I'kwe'sxa' luuçx na'wēysaçxáa i'kwe, kīh ũ'a'swa ũ'wepkaçxte, luuçx ũ'ni leçxi'sçxáa i'kwe ũ'we'.

13 Txã'wē leçxiçxá's ũ'sa' luuçx le'çxkwe kçxu'çxu'jnisa na'wēsaçxáata', txãsatx Dxus yakh ew fxi'zewa'j yu'sa' jiyu'çmée.

14 Nawa thē'jsa yã'ja' thē'jsa ũ'nisatx jxpa'gawa'ja', kīh ewsatxna vxite' kīh ewmeesatxna nawa txãatx jxuka jiyuya'.

## 6

1 Txãa pa'ga Kristo kaapiya'jni nyafxte thēymeekwesatx pta'sxtha'w txãa yakhçxáa fxi'zemée, jweeíçxáa wala piyana u'jwa'j ji'ptha'w, sxiigna fxi'zeya'mée. Nyafxte kaapiya'jnisa yakhçxáa yu' fxi'zemeeyuuga. Txã' naata': pkaltxi nvxihtçxa Dxus tasxte sxawedni, Dxusa' ũsyuhna sūhna ũusuh jxuka yaakxni,

2 yu'te ya'bautisāyni, Dxusna selpiwa'jsatx tx-hitxhçxa Dxus kusete neewe'weni, ki' itxi yu-uwa'ja's kaapiya'jni, Dxus kastigo iiméh seena'te pa'jwa'ja's pta'sxni, txãa nyafxte kaapiya'jnisata'.

3 Dxus pu'çxte' jweeíçxáa piyana u'jwe'nja'w.

4 Txã'wēme', maawa Dxus yakh fxi'zewa'ja's ew jiisa, Dxus peesku ewte neeyũuwa'ja's

txã'snawa ew jiisa, Dxus Espiritu'swa ũuste jxpa'gasa,

<sup>5</sup> txã'wěy Dxus yuwe ewsatewa jiisa, nmeh ente' Kristoçxaçxáa jxkaahwa'ja'swa jiisa,

<sup>6</sup> txã'wě kīhtewa ew jiisa Dxus tasxuh tx-utesaatxi' peena kaasxwedu'j wěete ya'ãja'çme'. Txãa pa'gatey txãawe'sxa' Dxus Nçxi'ka's ew jiiçxawa ahçena weeçxçxa kluuskhē ki' ki'psa na'wě yuusaata' naa pa'gak ya'ãja'çmée.

<sup>7</sup> Txãawe'sxtxi' na'wětha'w kaaja'da'ja': Kiwe mjīinisa' nus pa'jni yu'a's jxuka çxazxate', uuthasx ewsak kaseje', Dxus pu'çxte mjīisawe'sx jīi.

<sup>8</sup> Nawa ewsa kasehmée jxūth kīhte yuhwa seelpimeesaçxáa buçxate', kiwe txã'wěsa's nmehte' thegnimée yuuna. Txã'wěy maawa Dxusa's jiiçxa ki' txutesá' kīhte yuhwa seelpimée, ivxiituni yuutxna.

*Dxusa' kxtey yuuna sūhniisak çxhãçxha kaafx'i'ze'je'*

<sup>9</sup> Nawa i'kwe'sx yu' txã'wě yuumée, Dxus nwe'wenijūyã'ja' jweeíçxáa wala ew yūuna fxi'zene'kwe sūju'th.

<sup>10</sup> I'kwe'sx txã'wě ew yūuna yakhthē'jwe'sxtxi peeygāhna pu'çxna āate kaavxya'ja'jna ãçxpkaçx txã'wě ew yūuna nes txã'wě i'kwe, naa pa'ga Dxusa' i'kwe'sx ew yūuni's peçxkanameena.

<sup>11</sup> Nawa adxa' nmeh entepkaçx txã'wě kaavxya'ja'jna pa'pçxuna nesthu yūu jxthāasu' teeçxsa na'wěçxah. Txã'wě yūuçxa', kxulmée pa'pçxusa yuune'kwe.

12 Wa'lwa'j yu'sa' le'çxkwe yuhwa ji'phunuwe, yaçğaywe'sxwa ma'wêta Dxusa' kxtey yuuna sũhna ũusuh jxuka yajkxçxa Dxus peesni's jxpa'ga txã'wêy myũuwe.

13 Miiyajkxwe, Dxusa' Abrahana's pu'çxwa'ja's puutx we'weçxa' peekx yase'siçxáa kxsusna jurãyku, vxite txãate jxthaakwesa yu' meek yu' naa pa'ga.

14 Sa' na'jĩk: Isa, iidx ji'jtx wala nuypehnana idxa's pu'çxwa'jsath jĩnak jurãy.

15 Aça' Abrahana' wa'lmée ũythasçxa', jxpa'gak Dxus ma'wêne' yũuya' neeyũu txã'sa' jxuka.

16 Aça' nasawa juraĩççxa', txãawe'sxte jxthaakwe walasa's kxsusnatx juraĩ', kxtey yu'nja jĩna. Txã'wê yũute', ĩsxiimée kxtey yuuna sũhwa'jçxáak ya'ji'phu'.

17 Txãa pa'gak Dxuswa txã'wêy jurãy: Adx puutx we'weni's kxtey yu'nja jĩna. Dxusa' txajx puutx we'weni's le'çxkweçxáa yuhwa yu'pthehmée kxtey yuuya'k ũsu', aça' txã'sna jxpa'gawa'jsa' kxtey yuuyujuna sũhnaçxáa ũskahnku txã'wê yũu.

18 Dxus jurãyni' e'z jwedtxi yu': Kxtey yu'nja jĩna we'weni vxite' txajx yase's kxsusni. Txãa pa'ga txajx puutx we'weni' yu'pthehmeetxna. Kxahtha'w Dxusa' txajx puutx we'weni's kxtey yuuyujuna Dxusna pakwe-saatxi's sũhna çxhãçxha yaakxwa'ja's ji'phu'.

19 Dxusa' txajx puutx we'weni's kxtey yuuna sũhnisak kwe'sxtxi's jxpubamée çxhãçxha kaafxi'ze'je', txãa pa'gatey kwe'sxa' cielute ũssa

Dxus puutx we'weni kxtey yuuwa'ja's jiiçxatha'w ãythisu' naa pa'ga.

<sup>20</sup> Jesusa' cielute Dxus ãsnitek u'ka, Dxus tasxte pkalsawe'sx ju'gu we'we pu'çxçxa kwe'sxtxi kx-tee ka'ga'jya'. Txã' Melkisedek na'wēsak yu'.

## 7

### *Jesusa' Melkisedek na'wēsa'*

<sup>1</sup> Naa Melkisedekha' Salem çxhabte jxkaahsak yu', nawa txãaíçxáa pkalsawe'sx ju'gu we'we pu'çxsak yu'. Aça' teeçx ente' Abrahana' gweçxate puiina ãsçxa', naa kiwete jxkaahsa ewmeesatx knayçxa sxawedna pa'jaçte', Melkisedekha' pu'thegya' kasehçxa bedicion akhte',

<sup>2</sup> Abrahana' diesmo dukhku makwene' dukhwa'j ji'phu' txãa yu's jxuka. (Hebreo yuwete' Melkisedek jñisa' Ew Jxkaahsa jñisa', aça' Salem jñisa' wēt fxi'zeni jñisak yu'. Txãasa Melkisedekha' wēt fxi'zenite ew jxkaahsa' jñisa'.)

<sup>3</sup> Sa' txajx ney txajx njĩ'j txajx yaçgawe'sx txãatxi's ya'jiyu'çme', txajx upxhni en txajx uuni txã'wēsaçxa yuhtxwa. Txãasa Dxus Nçxi'k pkalsawe'sx ju'gu we'we pu'çxna nes yuusa na'wēysak yu' Melkisedekha'.

<sup>4</sup> Açxha' ew mjiyuwe: Melkisedekha' iiméh wala jxtuhthesa yu'k. Txajíik kwe'sx yaçgawe'sx Abraham yuhwa diesmo's txã'sna dukh gweçxate puiiçxa txajx jñitxi's ki' kusa'jni's.

<sup>5</sup> Moises leya' naasáa Levxi ji'j yuuçxáatxku jxkaaja' txãawe'sx nwe'sx diesmotx jxpa'gawa'jsa.

<sup>6</sup> Txã'wētewa, Melkisedekha' Levxi ji'jmeeçxawa Abrahan dukhni diesmo's jxpa'gak, sa' Abrahana' makwe Dxus txhitxhnisatewa Melkisedekha' bedekīyku.

<sup>7</sup> Bedekīysa' bedekīynisate jxthaakwe walasa' txã'sa' txã'wēme' jīya' ājameetxna kim yuhwa.

<sup>8</sup> Āçxh naa ensu kwe'sx pwe'sx dukhni diesmo's jxpa'gasa' nasa uuwa'jsaçxáata'. Nawa Dxus librute Melkisedekha's we'weçxa': Bagaçxte yuhwa uumée itxi ũssa jīna we'weç na'wēk pta'sxi':

<sup>9</sup> Levxi ji'jwe'sx jxukaysa na'wē diesmo's jxpa'ga'tx txãawe'sxwa diesmo's dukhsatx yuu Melkisedekna. Ew jiyute yu', txãawe'sx jxukaysa pa'gate Abrahanku dukh.

<sup>10</sup> Txã'wēk yuu jīkahnī Abrahana' Melkisedek yakh puutx uyçxa diesmo's dukheçte', Levxi ji'j yuuwa'jsa' Abrahan kakweju kasehmeytxi yu'.

<sup>11</sup> Ley nvxiitnisa Aaron ji'j levxiwe'sxçxáa txã'wē nasa pkalsatx Dxus tasxte kuutxa'jya' ājawaça', vxite kaahwa'j peejxmeene' yu', Melkisedekwa ma'wēga Aaron ji'thewe'sxmée yu' txã'wēysa.

<sup>12</sup> Txã'wē pkalsawe'sx ju'gu we'we pu'çxsa levxiwe'sxtxi kutxi'jçxa', leynawa phu'se'jwa'ja'.

<sup>13</sup> Na'wē vxite kaahwa'ja's we'we'k txã'wē kwe'sxtxi jxpe'jsa Jesukristo's we'weçxak txã'jī'. Jesukristo' Israel nwe'sxçxawa, Aaron ji'thewe'sx meek yu'.

<sup>14</sup> Judá ji'thewe'sxku yu' txã'sa' ew jiitha'w.



Aça' Judá ji'thewe'sxa' kim yuhwa pkalsawe'sx ju'gu we'we pu'çxwa'ja's ji'phmeeta'. Txajíik Moisesa' txã'wě yūuwa'ja's Judá ji'thewe'sxtxi' maa yuhtxwa kxsusmée.

<sup>15</sup> Aytek isa ew ya'jiyu' leya'swa phu'se'jwa'ja's. Txã'wě phu'se'khaníi pkalsawe'sx ju'gu we'we pu'çxwa'jsa' ley nvxiitnisamée, Melkisedek na'wēsak yu'.

<sup>16</sup> Txã' ley txhitxhçxa nvxiitnisamée, багаçxteçxáa yuhwa pçumée itxi fxi'zewa'jsak yu'.

<sup>17</sup> Txajíik Jesusa's we'weçxa na'jī Dxusa':  
Idxa' багаçxtewa pkalsawe'sx ju'gu we'we pu'çxna nes yuune'ga,  
Melkisedek na'wēsa jī'k.

<sup>18-19</sup> Txajíik Moises leya' nasa pkalsatx Dxus tasxte kuutxa'jya' ājamée ma'wēçxáa yuhwa, txāa pa'gak txāa leya's phu'se'jni yuu. Aça' āçxha' txāa leyte jxthaakwe ewsa ji'ptha'w txāa yakha' Dxus tasxte utxaaya' āja'tha'w.

<sup>20</sup> Dxus tasxte kuutxa'jya' ājawa'ja's Dxusa' nvxiituççxa' juraīmée yu' nvxihtme'.

<sup>21</sup> Dxus tasxte kuutxa'jya' ājawa'jsa jīnisa nyafxiawe'sxtxi' Dxusa' juraīmeeek nvxiht. Nawa Jesusa's txã'wě yuuwa'jsa nvxiituççxa', jurāyççak nvxiht. Txajíik Dxus librute na'jīna we'we':

Idxa' багаçxtewa pkalsawe'sx ju'gu we'we pu'çxna nes yuune'ga jīnak Dxusa' txajx we'weni's jurāy na' yu'pthehmeena.

<sup>22</sup> Txāa pa'ga Jesusa' jxthaakwe ew puutx we'weçxa nvxiitnisa'.

<sup>23</sup> Pkalsawe'sx ju'gu we'we pu'çxsa nyafxiiwe'sxa' wala kuh yu'tx, txãa pa'gatey uunatx u'jwe'. Txãasatx teeçxçxáa yu' u'pxa' ája'çmée.

<sup>24</sup> Nawa Jesusa' uuwa'jsame', txãasa pkalsawe'sx ju'gu we'we pu'çxna ũswa'ja's vxitetx nvxiht-meena.

<sup>25</sup> Sa' txã'sna pi'kxçxa Dxus tasxte utxaawa'ja's pakwesáa yuutxi's nwe'weçxa, bagaçxte yuhwa vxituwa'jmeete nvxiht-ya' ájana, txãa pa'gatey txã' bagaçxte yuhwa uumée itxi nes yuuwa'jsa', pkalsawe'sx ju'gu we'we pu'çxna.

<sup>26</sup> Pkalsawe'sx ju'gu Dxus tasxte we'we pu'çxsa' Jesus na'wësa ewspatha'w peejx yu'. Txã' kíh pkal yuhwa ji'phmeesa, bagaçxte yuhwa ewmée yũuna fxi'zesamée, naa kiwetewe'sx na'wësa meek yu'. Txãasak Dxus pukate kâhpkçaçx jxũna u'jnisa yuu.

<sup>27</sup> Pkalsawe'sx ju'gu we'we pu'çxwa'jsa nyafxiiwe'sxa' na'wëtx een isa tajkx ikhçxa Dxus altalte kabu' txã'wë yũuwa'jsa meek yu'. Txãawe'sxa' nyafxte' peekx pkalpa'ga khuê'y txã'wë tajkx kabçxatx nasaa pkalpa'gawa txã'wëy yũ'. Nawa Jesusa' een isa txã'wë tajkx ikhme', txãa yuuk uu tee dxi'jçxáa jxukaysa pa'gate.

<sup>28</sup> Pkalsawe'sx ju'gu we'we pu'çxwa'jsatx Moises ley nvxiituççxa', naa kiwete nasa áhmeekwesaçxáatxku nvxiitu'. Nawa ley skhēwnite Dxus jurâyçxa txã'wë yũuwa'jsa nvxiituççxa', txajx Nçxi'k iiméh thaakwe ewsa'sku nvxiht bagaçxtewa nes yuuwa'jsa.

## 8

*Dxus u'se puutx we'weni's kxtey yuukahn*

*pu'çxsa' Jesusa'*

<sup>1</sup> Na'wě pkalsawe'sx ju'gu Dxus tasxte we'we pu'çxsa jĩ'tha'w txã' maatewa jxthaakwe ewsa cielute Dxus pukate kaçxçxa

<sup>2</sup> pkalsawe'sx ju'gu we'we pu'çxna ũsa' Dxus ũsnite yuu u'kaçxa. Txãa Dxus ũsni' nasaa txaahnisame', txã'sa' Dxus yuuk txah.

<sup>3</sup> Pkalsawe'sx ju'gu we'we pu'çxna ũssa nyafxiiwe'sxa' pkalpa'ga tajkx ikhçxa Dxus al-talte kabna nes yuuwa'jsa jĩçxa nvxiitnisatx yu'. Txãa pa'gak Jesukristowa kĩhçxáawa nuykũuwa'j ji'phu.

<sup>4</sup> Jesukristo' naa kiwete txã'wě pkalsawe'sx ju'gu we'we pu'çxna ũswa'ja's vxit wēewaça', ājawa'jmeene' yu', txã'wě ājakahmeníi Moises ley nvxiitnisatx ũs yu' pkalsawe'sx ju'gu we'we pu'çxsa.

<sup>5</sup> Nawa naa kiwete txã'wě pkalsawe'sx ju'gu we'we pu'çxsa' naasáa cielute ma'wēçxah yũuwa'jna txã'sna kaajiyu'jniçxá'stxi selpi'. Txã'wě cielutewe'sxa's kaajiyu'jnisate íiçxáak Dxusna neewe'wena ũswa'j yat Moises txajaçte', Dxusa' na'jĩna we'we: Ew mtheg, sa' thã'j vxiçte adx ma'wě kaavxya'ja'the', txã'wēy yũune'ga jĩk.

<sup>6</sup> Nawa Dxus tasxte kwe'sx ju'gu we'we pu'çxsa Jesukristo selpiini' thaakwe ewa', txãa pa'gatey Dxus thaakwe ew pu'çxwa'ja's iiméh ew puutx we'wek txã'sna selpiina ũsa'.

<sup>7</sup> Nyafxíi puutx we'weni' ew kasehwaça', e'su ki' puutx we'wewa'j peejxmeene' yu'.

<sup>8</sup> Nawa txã'wě ew kasehpa'gamée, nasa' ewmée fxi'zepa'ga, Dxusa' na'jĩk:

Israel vxite' Judá yakh adxa' ki' u'se puutx  
we'wewa'j en pa'jana,

<sup>9</sup> Egipto kiwejũ peeygähna kutxi'jçxa i'kwe'sx  
yaçgawe'sx yakh puutx we'weth  
txã'wēmée yuuna.

Txãa ente' adx puutx we'weni's kxtey yuumeeta',  
Txãa pa'gath thegmée nvxiht.

<sup>10</sup> Nawa txãa e'su' Israelwe'sx yakh na'wẽ puutx  
we'we'nja jĩ'k Dxusa':

Adx jxkaahnitxi's txãawe'sxtxi kaajiyu'jçxa,  
ũuste fxi'jçxa nvxiitu'nja.

Sa' adxa' txãawe'sx Dxus yu'nja,

Aça' txãawe'sxa' adx jĩi yuutxna.

<sup>11</sup> Dxusa's jiyukahñ teeçxsa na'wẽçxah  
kaapiya'jwa'j ji'phumeetxna, txãawe'sx  
nwe'sx vxite' txãawe'sx nyakhçxáa  
yuhtxwa,

Txãa pa'gatey le'çxkwesa ma'tx yuu meeçxa'  
thẽ'jsa ma'tx yuu nawa thẽymée jiyuya'  
ãjatxna adxa's.

<sup>12</sup> Sa' txãawe'sx pkaltxi peltunãyçxa, peena  
yu' bagaçxteçxáa yuhwa yajxme'nja  
txãawe'sx pkaltxi's jĩ'k.

<sup>13</sup> Dxusa' ki' vxite u'se puutx we'wewa'j ji'pthu  
jĩçxa', yaçiwe'sxa' selpiime' jĩçxane' txã'jĩ'. Aça'  
selpimée yuuna pa'jsa' skhẽwwa'jsana.

## 9

*Dxus ũsni naa kiwetewe'sx vxite' cielutewe'sx*

<sup>1</sup> Dxus puutx we'wenisa nyafxiiwe'sxa'  
jxkaahni ji'phuk Dxusna neewe'wena

kxtey nwēese'khan dxuus yat naa kiwetewe'sxçxáaçxawa.

<sup>2-4</sup> Txãa yata' e'z jwedku txudeni yu': nyafxte u'kana kũunisate Dxusna neewe'wena ũsni jĩnisatetx bela txaahnisa vxite' pan āsxni mesa vxyuu bee altal incienso kabnisa txã'wēsa ũsu'. Aça' e'ste txudenisate' kim yuhwa u'kanimeesa naasáa Dxus yuuçxáa ũsni jĩnisak yu'. Kxteea' kaja vxyuu behçxaçxá's jxuka skadnisak ũsu'. Txãa kaja dxiite yu' teeçx vxyuu bee jaçxu maná ji'phsa, vxite' Aaron khaabu ye'çxku txãa, vxite' Dxus jxkaahni kwet taplate fxi'jni yuuk txáatx jxaawni ũsu' kaja dxiite.

<sup>5</sup> Txãa vxyuu bee kaja kajkwete yu' Dxus angel na'wēysatx piisaçxa txaahni ũsu', Dxusa' ayte nesku yu' jĩna kaajiyu'jsata'. Sa' txãawe'sx fxuu ku'taju jxukatx aphna ũsu', na'wē pkalpa'ga tajkx ikhçxa txãa eea's jxũna kũhçxa txaja'tx txã'sna. Nawa txã'wēsatx ew āate pta'sxwa'j en ji'phmeeth āçxhíi yu'.

<sup>6</sup> Sa' txãa yatte txã'wē pheu'jni nyafxte u'kana kũunite yu' pkalsa ju'gu we'we pu'çxsawe'sxa' u'kana nestxi yu', ma'wē yũuwa'ja'swa kxtey yuuna.

<sup>7</sup> Nawa vxite ahte e'ste yu' txãawe'sx npiičthē'j teeçxçxáak u'ka', anxute tee dxi'jçxáa. Sa' kxtee u'kaççxa', perdon pējxya' takx eea's jxũçxak u'ka', peekx pkalpa'ga vxite' nasaa pkalpa'ga jĩ yã'jçxa.

<sup>8</sup> Txã'wē nyafxte u'kanisa Dxusna neewe'wena ũsni jĩnisa' selpiina nesku yu' Dxusa's neewe'wewa'j. Nawa vxite ahte Dxus yuuçxáa ũsni jĩnite u'kawa'j dxi'j yu' phatemeyku yu'

txã'wêk Dxus Espiritu' kaajiyu'ju'.

<sup>9</sup> Kĩhwa jxuka txã'wê yũunisa' ãçxh naa en-suwe'sxa's kaajiyu'jsaçxáak yu'. Kxtee tajkx ikhçxa Dxusna weçxana kabnisa' txãawe'sx pkaltxi khukhya' ãjawa'jsame'.

<sup>10</sup> Txã'wê yũunisa' Dxus yu'pthehpkaçxçáatx selpiwa'jsa yu', txãasatx kajkwekhê ãakhêwe'sxa'sçxáa jxkaaja' ũ'nisu, tudxnisu, kakwete ate fxi'zewa'j txã'wêsatx.

<sup>11</sup> Nawa ãçxha' pkalsa ju'gu we'we pu'çxsa thaakwe ewsa ũyhasnisa pa'kh txã' Křisto'. Sa' txajx yujuni' nasaa vxitnisa naa kiwetewe'sxmée, cielute iiméh ewstate u'kaçxa kxtee pkalsa ju'gu we'we pu'çxna selpiina ũsa'.

<sup>12</sup> Sa' Křisto' Dxus yuuçxáa ũsnite kĩh pkal yuhwa meetek u'ka. Nawa txã' kapla ee vxite' klaa luuçx ee txã'wêsatx jxũçxa Dxus tasxte u'kame'. Txajx ee yuunak pkawçxa u'ka tee dxi'j yuuçxáa. Nawa jxukaysa bagaçxteçxáa yuhwa vxitumée ewte neeyũuwa'ja's vxit-ya'k txã'wê yũu.

<sup>13</sup> Na'wê klaa ee kapla ee vxite' klaa luuçxa's al-talte kabnisa khuuç txã'wêsatx nasaa kakwekhê pẽ'çuçte', ãakhê kazx pẽetheni's yaatesaa dxihte',

<sup>14</sup> Křisto ee yu' wejx thaakwe yaateya' ãjawa'jsana. Txã'wê yaateya' ãjakahnii, Dxus Espiritu pçuwa'jmeesa pu'çxte Křisto' peekii ya'dukhçxa kĩh pkal yuhwa ji'phmeek txajx eea's pkaw pkalsa pa'gate. Txãasa txajx eea' kwe'sx ewmée ũus yaakxni dxiitewe'sxa's khukhya'jsa', Dxus itxisa's selpiiya' ãjakahn.

15 Dxusa' kwe'sxtxi nwe'wewa'ja's u'se pu-  
 utx we'wek txã'sna Jesukristo' kxtey yuuna  
 ũsa', na'wẽ nyafxte Dxus puutx we'wek txã'sna  
 nwẽese'jmeeçxa pkalte wetetha'w txãa pkalwa  
 peltunãynik yuu Kristo uupa'ga. Txah Je-  
 sukristo nwe'wenisawe'sxa' jxpa'gaya' ãjatxna  
 Dxus jĩi bagaçxteçxãa yuhwa pçuwa'jsamée  
 kwe'sx jiiçxaçxãa yuuwa'ja's nvxihtku txã'sna.

16 Nawa na'wẽsa's miiyajkxwe: Adx uute', adx  
 ji'phuni's idx uweene'ga jĩna puutx we'weçxa  
 eçte fxi'jçxa nvxiitnisa', selpiiyujuna.

17 Nawa txã'jĩna nvxiit-sa uuteçxãa txãa eça'  
 selpiina. Txã'jĩna nvxiit-sa uumeyte yu', txãa  
 eça' selpi'çme'.

18 Txajíik Dxusa' nyafxíi puutx we'wena  
 fxi'jçxa nvxiitnisa'swa ee pkawçxa nvxiht selpi-  
 ina neeyũukahn.

19 Txã'sa' na'wẽk yũu Moisesa': Nasa  
 jxukaysatx pta'sxku ley jxkaahni ma'wõtewa  
 jxuka. Txã'wẽ yũuçxak khas beh vxite' ějxa  
 ku'ta yakh klaa luuçx ee vxite' kapla eete yu'  
 ka'dnisate akhçxa Dxus puutx we'wena fxi'jçxa  
 nvxiitni eç kajkwesu pẽ'çhuç. Sa' nasatxwa  
 jxukaysatx txã'wẽyku yũu na'jĩna:

20 Dxusa' na'wẽ i'kwe'sxtxi jxkaahna puutx  
 we'wena fxi'jçxa nvxihtku txãa eça' ãçxha'  
 i'kwe'sxtxi jxkaahna selpiiya' ãjana, ee pkawni  
 yuupa'ga jĩk.

21 Sa' Dxusna neewe'wena ũsni yat vxite' kxtee  
 kĩhçxah ne'ta ũsu' txãatxwa txã'wẽyku ee yakh  
 pẽ'çhuç Moisesa'.

22 Ley we'weçxa': Kĩhnawa jxuka ee yakh

yuuçxáa yaatewa'j yuuna, aça' ee pkawmeete yu', pkala' peltunãynimée yuutxna jĩnak jxkaaja'.

*Kristo uuni' pkaltxi jxuka khukhku*

<sup>23</sup> Txã'wẽ cielute ma'wẽna txã'sna kaajiyu'jsa naa kiwetewe'sxçxáa yuhtxwa yaatena ũswa'j peejtxi yu', tajkx ikhçxa txãa ee yakh. Aça' cielute ũswa'jsatx yaatewa'j yu' wejxku thaakwe ewsa peejx yu', tajkx ikhe'tx txã'wẽsamée.

<sup>24</sup> Kristo' naa kiwete nasaa txaahnisateçxáa u'kame'. Txã' cielute yuuk u'ka, sa' ãçxha' kxtee Dxus tasxte kwe'sx ju'gu we'we pu'çxna ũsa', aça' Dxusna neewe'wena ũsni yat naa kiwetewe'sxa' cielute ma'wẽna txã'sna txã'wẽy piisanisaçxáak yu'.

<sup>25</sup> Pkalsawe'sx ju'gu we'we pu'çxsa npiiçthẽ'jsa' aanxu isa tee dxi'jçxáak u'ka', Dxus yuuçxáa ũsni jĩnisate. Nawa peekx eemée, takx eeçxá'sku jxũçxa u'ka', kxtee pẽ'çhuçya'. Nawa Kristo' uuçxa kujus Dxus tasxte u'kame'.

<sup>26</sup> Txã'wẽ yũuwaça', naa kiwe's vxitiyna aanxu isa uuna nesne' yuuwa'jsa yu'. Nawa txã'wẽ yũumée, Kristo' tee dxi'j yuuçxáak kluuste uuya' vxyaa jxukaysa pkaltxi khukhya'.

<sup>27</sup> Txãa pa'gak nasatxwa tee dxi'jçxáa jxukaysatx uuwa'jsa vxitçxa txãa e'su' ma'wẽsaçxawa Dxus tasxte paswa'j vxitni yuu,

<sup>28</sup> txã'wẽy Kristowa tee dxi'j yuuçxáak kluuste uu maazkuêesa pkaltxiwa jxuka khukhya'. Sa' txãa e'su' ki' vxyaana, nawa pkaltxi khukhya' ki' uuya'mée, naasáa txã'sna ũythassatx pe'jna u'jya'çxáa txã'wẽ vxyaana.



# 10

1 Moises leya' naasáa thaakwe ewsa vxyaaya' ũsu'tx txâatx kaajiyu'jsaçxáatx yu' txã' isa ewsa yã'j yu'çmeeta', txãasa na'wē Dxus tasxte utxaaya' aanxu isa tajkx ikhna nestxi yu' txãawe'sxtxi' pkal ji'phmeesa vxit-ya' bagaçxteçxáa yuhwa ãjawa'jsa meek yu' leya'.

2 Txãa leya' nasatx pkal ji'phmeesa vxit-ya' ãjasaawaça', na'wē pkalpa'ga maazkuēe uswa tajkx ikhna nestxi yu' txã'wē yūuna nes yuuwa'j peejxmeene' yu'. Txãa pa'gatey pkalpa'ga tee dxi'j tajkx ikhçxa kabnijũyã'j yu', pkalsatha'w sūhwa'j peena yu' ũusuthemeena.

3 Nawa txã'wē yūupkaçxte, aanxu isa pkalsatha'w sūhna nesku ya'yū',

4 txãa tajkx ikhnisa klaa ee vxite' kapla ee txã'wēsa' pkaltxi khukhu'çmeeta' naa pa'ga.

5 Txãa pa'gak Kristo naa kiwete pa'jaççxa', na'jina we'we Dxusa's:

Tajkx ikhçxa kabni's jxpa'gameeçxa, adx kakwe yakh uuwa'ja'sgu vxit.

6 Pkaltxi khukhya' tajkx ikhçxa kabnisatx weçxa'çmeeg.

7 Txahth na'ji: Dxus, iidx jxthãasniçxá's kxtey yuuya' yuhth,

Adx fxi'zewa'ja's ma'wē fxi'jni ũsna txã'sa' kxtey yuuya' jĩk.

8 Na'wē Kristo we'weçxa': Pkaltxi khukhya' tajkx ikhçxa kabnisatxi's weçxa'çmeeg, (txã'wē yūuwa'ja's makwe ley jxkaahnisatewa),

9 txãa pa'ga: Dxus, iidx jxthãasniçxá's kxtey yuuya' yuhth jĩk Kristo'. Isa ew jiyute yu', naa

tajkx ikhna ũsni's ivxiituçxa, txãa pa'gate vxite uuwa'jsath nvxiitu' jĩçxane' txã'jĩ'.

10 Jesukristo' Dxus jxthãasni's kxtey yuuçxa txajx kakwe's peekíi ya'dukhçxa kluuste uuk jxukaysa pa'gate tee dxi'jçxáa. Txãa pa'gak Dxusa' kwe'sxtxi's txãa jĩi vxit.

11 Pkalsawe'sx ju'gu we'we pu'çxa judiuwe'sxa' txã'wẽ yuh een isa maazkuẽe uswa tajkx ikhçxa altalte kabna nestxi yu' jxkaasewa'jmée, makwe txã'wẽ yũunisa' bagaçxte yuhwa pkaltxi' khukhwa'jsameetewa.

12 Nawa Jesukristo' pkalpa'ga tee dxi'j yuuçxáa kluuste uuni yakhçxáa jxuka jxã'jnik yuu txãaçxáa bagaçxtewa selpiwa'jsa. Txãasak cielute Dxus pukate kaçx.

13 Sa' ãçxha' kxtee ũsa', txã'sna açesa jxukaysa txã'sçxaçxáana nwẽese'jwa'ja's Dxus vxitna jxã'phkaçx.

14 Txãa pa'gatey tee dxi'j kluuste uuníi yakhçxáa jxuka jxã'jnik yuu txajx nasa yu-uwa'jsawe'sx jĩi bagaçxtewa selpiwa'jsa.

15 Txã'wẽ Kristo tee dxi'j kluuste uuniçxáa bagaçxtewa selpiwa'jsateíçxáak Dxus Espirituwa na'jĩna we'we:

16 Txãa en skhẽwnijũ' na'wẽ yũuya' puutx we'we'nja jĩ'k Dxusa':

Adx jxkaahnitxi's txãawe'sx ũuste kxu'akhe'je'nja peçxkanakahmén.

17 Sa' txã'wẽ yũunijũ', txãawe'sx ewmée yũuna fxi'zeni pkaltxi's bagaçxteçxáa yuhwa ya-jkxme'nja jĩ'k.

18 Txã'wẽ pkaltxi's jxuka peltunãynijũyã'ja', peena yu' pkalpa'ga tajkx ikhçxa kabna ũswa'j peejxme'.

*Dxus tasxte utxaawa'ja's ji'ptha'w*

19 Txãa pa'ga, yakthẽ'jwe'sx, açxha' kĩh pkal yuhwamée Dxus yuuçxáa ũsnite u'kawa'ja's ji'ptha'w, txã'wẽ Jesukristo' ee pkawçxa

20 Dxus tasxte u'kawa'j dxi'j u'sesa's phaadek. Kxtee Dxus ũsnite' kim yuhwa u'kakahmén txudenik ũsu', nawa txãa yuuk kluuste uuçxa kxtee txudeni's phaade kwe'sx u'kakahn.

21 Txãasa Jesusa' Dxus tasxte we'we pu'çxna ũsa' Dxus luuçx jxukaysa ju'gu.

22 Txãa pa'ga Kristo' pu'çxyujuna sũhna ũusuh jxuka yajkçxça Dxus tasxte ũukhmée utxaaga, txãa pa'gatey Kristo' kwe'sx ũuste pkaltxi' jxuka yaatek, aça' kwe'sx kakwewa bautismote akhnik yuu, yuuwemeesatha'w sũhnaçxáa yaakxkahn.

23 Açxha' Dxus tasxte utxaawa'ja's jiiyã'tha'w na' Dxus yakh txutemée txãa yakh yuuçxáa çxhãçxha fxi'zega. Txãa pa'gatey Dxusa' kwe'sxtxi bagaçxte yuhwa pçumée itxi fxi'zewa'ja's ũsya' puutx we'wek txã'sa' kxtey yuuna.

24 Sa' ew yũuna peeygãhna fxi'zewa'ja's ji'phuya' puutx ya'pu'çxhiga kxteeçxah.

25 Vxite na'wẽtx kwe'sx pkhaakheçte pa'jaçmée txã'wẽ yũumée, wejxwa teeçxsa na'wẽçxah kxteeçxah puutx kçxhãaçxha'jna fxi'zega, na'wẽ Kristo kĩiwa'j enwa utxaaçyã'ja' naa pa'ga.

26 Txã'wẽ ewsa's ãate pta'sxni wala ew jiiçxa txã'sa' ahçena txute'nja'w, aça' txã'wẽ yũusa's peena yu' peltunãywa'jmée yuuna.

27 Naasáa iiméh seena' ũukhũukhsaçxáak ũythasu', Dxus kastigo ipx seena'sa jxuka ivxi-ituwa'jsa Dxusna açesawe'sxtxi.

28 Ma'wẽga Moises leyçxáa yuhwa txã'sna nwẽese'jsameetxi' e'z meeçxawa tekx nasa txã'wẽ yũuni's jiiSATX pẽjçxça isa dxihte', peeygãawa'jmée ikhwa'jçxá's vxitu'.

29 Aça' Dxus Nçxi'ka's ahçeçxa weeçxina, sa' txajx eea's pkawçxa uuni'swa kĩhte yuhwa seelpimeesa na'wẽ weeçxina, sa' txã'wẽy Dxus Espiritu peeygãasa'swa açesa', wejx seena' kastigãyni yu'nja'w sũhwa'ja's mji'phuwe, txã'wẽ Jesukristo eea' Dxus puutx we'weni's kxtey yuuwa'ja's vxitwa'jsa' txãa eeiçxáa i'kwe'sx pkaltxiwa peltunãysa' na's txã'wẽ açepa'ga.

30 Dxusa' na'jĩnak we'we txã'sa' mpa'yajkxwe: Adxçxáa kastigãywa'jsath, txã'sa' adx jiine'tka jĩ'k. Sa' ki' we'weçxa': Adx jxpe'jni nasatxi's kastigaĩ'nja jĩ'k.

31 Txãa pa'ga seena' yuh ũukhũukha', Dxus ãtxisa kusete kastigãywa'j wetena pa'the'.

32 Nawa txã'wẽ yũuya'mée i'kwe'sxa' nyafxi-itey fxi'zeni's miijajkxwe: nyafççxah Dxus yuwe's jxpa'gaççxa', wala pxthaa yuui'kwe tx-akwe wala thẽysa pa'thewa.

33 Sa' i'kwe'sx maaiía' wẽesxuna nasaa ksx-avxyte pãpani i'kwe yuu, aça' vxitewa txã'wẽy nxussawe'sx yakh ja'daçxah nxussa i'kwe yuu.

34 I'kwe'sxa' karcelte ũssawe'sx pa'gate

peeygãawa'ja's ji'phui'kwe, sa' i'kwe'sx  
 ji'phunitx kusa'jaçte', ãusaçxamée  
 weçxanai'kwe neeyũu. Cielute bagaçxteçxáa  
 yuhwa pçuwa'jsamée thaakwe ewsa's  
 jiiçxai'kwe txã'wẽ yũu.

<sup>35</sup> Txã'wẽsa's jiiyã'jçxa', peçxkananuwe, txãa  
 pa'gatey txã'wẽçxáa yajkxna fxi'zepa'ga txã'wẽ  
 seena' wala ewsa's jxpa'gawa'jsai'kwe.

<sup>36</sup> Dxus jxthãasni's kxtey yuuya' nxuswa'ja's  
 wa'lmée jxpa'gawa'j ji'phi'kwe. Txã'wẽ yũuçxa',  
 Dxus peesni seena' wala ewsa's jxpa'gane'kwe.

<sup>37</sup> Txã'wẽme', Dxus librute na'wẽk we'we':  
 Wejx jxthẽeyuumée dud yuh kiijana  
 Txãa kiiwa'jsa' txaçxhimeena.

<sup>38</sup> Aça' Dxusçxáana yajkxna fxi'zesa' ewte  
 neeyũuna.

Nawa txã'wẽ yũumée txuteete', txãa yakha' wẽt  
 fxi'zeme'nja jĩ'k.

<sup>39</sup> Nawa na'wẽ txuteeçxa vxituwa'the ãsta'  
 txãatewe'sxmeetha'w kwe'sxa', wejxwa  
 kwe'sx ãus vxitukahmén Dxusa'sçxáa yajkxna  
 fxi'zesatewe'sxtha'w.

## 11

### *Dxusa's ãuste yaakxnisa*

<sup>1</sup> Dxusa's ãuste yaakxsa' yafxju áate yu'  
 uymeeçxawa, ãuste yu' jiiik ya'fxi'ze' kxtey yu-  
 uyujuna sũhna ãythasna.

<sup>2</sup> Kwe'sx yaçgawe'sxa' txã'wẽ yaakxwa'ja's  
 ji'phutx, txãasatx Dxus dxi'pte ew fxi'zesa yuu.

<sup>3</sup> Sa' kwe'sxwa txã'wẽy yaakxwa'ja's ji'ptha'w,  
 txãasatha'w açxh na'wẽ kiwe ãsa' txã'sa' Dxusa'

txajx we'weni yakhçxáa vxitne' nyafxíi yu' kǐhwa meetewa sǔju'.

4 Abela' tajkx ikhçxa kabte', Dxusa' weçxayujuna sǔhna ũuste jiiçxak txã'wě yǔu, Kain jǐite thaakwe ewsa. Aça' txã'wě yǔunisa' Dxus yakha' ewसाने' yu' naa pa'ga Dxusa' jxpa'gak. Aça' Abel yu' uuni', nawa Abela' txã'wěk Dxusa's ũuste jxpubamée yajkx jǐni yu' açxpa'jwa ũsa'.

5 Enokwa txã'wě Dxusa's ũuste ew jiiçxa Dxus yakhçxáa fxi'zepa'ga, uumey pe'jna u'jnik yuu cielun. Txãa pa'ga peena yu' uymeeta', txã'sa' Dxusku pe'jna u'j txãa pa'ga. Aça' Dxus librute Enokha's we'weçxa': Nyafxíi uumey Dxus yakh weçxanak fxi'ze' jǐ'k.

6 Nawa ũuste Dxusa's yuuçxáa yaakxwa'ja's ji'phmeete', Dxus yakh weçxana fxi'zeya' ya'ãja'çme', txãa pa'ga txajx tasxte utxaasa' Dxusa' ũsna sa' txã'sna pakwete', nwe'wena sǔhwa'ja's ũuste ji'phuwa'ja'.

7 Noewa txã'wěy Dxus we'weni' kxtey yuuyujuna sǔhwa'ja's ũuste jiiçxak yu'. Txãasak kastigo nus pa'jyujuna sǔhçxa Dxus jxkaahni's nwěese'jçxa barko's vxit, txajx yattewe'sxtxi jxuka nwe'weya'. Sa' Dxusa' kxtey yuuyujuna sǔhwa'ja's ũuste ji'phupa'ga, Dxusa' kxtey yuute', naa kiwetewe'sxa' ya'kastigãytxi aça' Dxusa' Noea's ewsa' jǐnak we'we.

8 Abrahamwa txã'wěy Dxusa' kxtey yuuyujuna sǔhwa'ja's ũuste jiiçxak, Dxus kiwe ũsya' pa'yate', nwěese'jçxa kasehna u'j, nawa mtee pa'jwa'ja'sçxáa yuhwa jiiimeek yu'.

9 Txã'wẽ Abrahana' Dxus kiwe ũsya' neeyũune' txã'sa' bagaçxteçxáawa kxtey yuuyujuna sũhwa'ja's ũuste jiiçxak maa sũhmée txagaçxhíi yu' pa'jsa na'wẽçxáa tultu txahçxa fxi'zena ũsu'. Aça' Isaak, Jakob txãawe'sxwa txãa kiwe's jxpa'gawa'jsaçxawa, txã'wẽyçxáatx pa'jsa na'wẽ fxi'zena ũsu'.

10 Txãa pa'gatey Abrahana' cielute Dxus vx-itni çxhaba's jxpa'gawa'ja'sku ũythasna ũsu', txãasak maa sũhmée fxi'ze'.

11 Abrahana' txã'wẽ Dxus we'weni' kxtey yuuyujuna sũhwa'ja's ji'phupa'gak Sara' txakwe wala thẽ'khwe luuçx ji'phuwa'jsamée yã'jçxawa, luuçx ji'phu.

12 Txãasak Abrahana' txajx ji'j iiméh wala kuh ji'phsa yuu, cielute estrelxa vxite' yu'pukasu kwetmusetx ma'wẽga isate ya'ãja'çmée txã'wẽk kuh ji'phu, txakwe iiméh wala thẽ'khwe yã'jçxawa.

13 Na'wẽ Dxusna yaakxsa nakwe wala kuh kxsustha'w txãawe'sxa' Dxus ũsya' neeyũuk txã'sa' jxpa'gamey uutx, txãasatx e'su txaçxteçxáawa Dxusa' kxtey yuuyujuna sũhna weçxana yaaki'. Sa' txãawe'sxa' naa kiwete tudtewe'sxçxáa ne'tka'w jĩnatx we'we.

14 Txãawe'sxa' txã'wẽ we'weçxa' ew jiyute yu', vxite ahte ũsya' u'jwa'ja's pakwesáa ne'ta yu'.

15 Txãawe'sxa' maa kiweju yuusaaçxawa txã'sna yajxna ũswaça', txãa kiwenii sxawedwa'j ne'ta yu'.

16 Nawa txãawe'sx ũswa'j thaakwe ewsa's ne'ta pakwesáa yu' cielutewe'sxna, txãasatx sxawedmée. Txã'wẽ sxawedmeeta' txãa

pa'gak Dxusa' thaame'çmée txãawe'sx Dxusthu jīna ya'kxsuswa'ja's, txãasa txãawe'sx ũswa'j pheu'jni ji'pha'.

<sup>17</sup> Abrahana' txajx nçxi'k Isaakha's ikhtewa Dxusa' ki' ĩtxi vxituna sūhwa'ja's ũuste jiiçxak ikhya' jxūna u'j. Dxusa' Abraham kīh yūutewa jiyuya' sūhçxa txajx nçxi'k teeçxçxáasa's ikh kaathewa, wa'lmée kxtey yuuya'wak yu'. Makwe Dxus txāa yakh puutx we'weçxa':

<sup>18</sup> Iidx jī'j Isaaktewe'sx txã'wē wala penatxna jīna we'wetewa, ikhya'wak yu'.

<sup>19</sup> Nawa Abrahana' txajx ũuste yu' uutewa Dxusa' ki' ĩtxi vxituna sūhwa'ja's ji'phu'k. Txāasa isa ew yajkxte yu', Abraham nçxi'ka' uusaawe'sx ksxavxyu ki' ĩtxi yuusāa na'wēsa'.

<sup>20</sup> Isaakwa Dxusa' kxtey yuuna sūhwa'ja's ũuste ew jiiçxak txajx nçxi'k Jakob Esau txãawe'sxtxi' bedicion wala jxpa'gane'kwe jīna we'we.

<sup>21</sup> Jakobwa Dxusa' kxtey yuuna sūhwa'ja's ũuste ew jiiçxak uuçyã'jçxa', José nçxi'ktxi teeçxsa na'wēçxah jxukaysatx wala bedekīni yuune'kwe jīna we'we, sa' Dxusa's neewe'wek kīiçhuçxa.

<sup>22</sup> Josewa Dxus pu'çxte' Israelwe'sxa' Egipto kiwejū kasejetxna sūhwa'ja's ũuste ew jiiçxak, uuya'wayã'jçxa txãawe'sxtxi neewe'we txajx kakwe's mtee jxūna u'jçxa pedaawa'ja'swa.

<sup>23</sup> Moises neywe'sxwa Dxusa' nwe'wena sūhwa'ja's ũuste ew jiiçxatx tekx a'te uta Moisesa's sūth, luuçxa' wala zhiçxkwe yu'ne' txāa pa'ga. Makwe Egipto kiwete jxkaahsa yu' ikh kaathewa ikhmeeta'.



24 Moiseswa Dxusa' pu'çxhina sũhwa'ja's ũuste ew jiiçxak, Egipto kiwete jxkaahsa niisa nçxi'k jĩna kxsusni yuuwa'j yu'sa' wa'l, walaana kãhçxa'.

25 Sa' naa kiwete pkalte weçxana fxi'zepkaçxte, wejxwa ũukhmée Dxus txhitxhnisa yakh ja'daçxah pkxuuni yuuwa'ja'sçxáak yajkx.

26 Txãa pa'gatey cielutewe'sxa's jxpa'gawa'ja'sçxáak yajkxçxa fxi'zena ũusu'. Txãasak Egipto kiwete iiméh seena' wala ji'phuni's yaakipkaçxte, Kristo na'wěy yaaçeni pkxuuni fxi'zeni's ji'phuya'çxáa yajkx.

27 Dxus pu'çxwa'ja's ũuste ew jiiçxak Moisesa' jxkaahsa ũusçxani yu'sa' ũukhmée Egipto kiwejũ kasehna u'j, sa' Dxus tasxu le'çxkweçxáa yuhwa txuteméek fxi'ze, Dxusa' vxyaasameetewa yafxju uyna ũs na'wě yajkxna.

28 Dxusa' nwe'weyujuna sũhwa'ja's ew ũuste jiiçxak Moisesa' Paskua fxiesta's vxitçxa eea's vxitxkhě sxũsx kaah, ikhwa'jsa angel sêhçxawa Israelwe'sx luuçx nthě'jsa maa yuhtxwa ikhkahmen.

29 Israelwe'sxwa Dxusa' pu'çxhina sũhwa'ja's ũuste ew jii yuupa'gaçxáak, mar bejuy uykhěwwa'j dxi'j phaate txãawe'sx uykhěwkahn. Aça' Egiptowe'sxwa txã'wěy uykhěu'nja'w sũhçxawa txãawe'sxa' ikhtee uutx yu' afxihbte.

30 Dxusa' pu'çxhina sũhwa'ja's ũuste ew jiiçxatx Israelwe'sxa' Dxus we'weni's nwěese'jçxa txã'wě siete enpkaçx Jeriko çxhabte muralxa peeku'j tadxina ũusu', aça' txã'wě nwěese'pha'gak muralxa' wete.

<sup>31</sup> Rahabwa Dxusa' nwe'weyujuna sũhwa'ja's ũuste ew jiiçxa, Israelwe'sx e'zsa kxtee peethegu'jya' pa'jsatx ewku jxpa'ga. Txãa pa'gak uumée, Dxusa's nwēese'jsameewe'sx vxite yu' uutewa.

<sup>32</sup> ¿Kĩh jwee yu' pta'sxitka? En ji'phwaç yu' pta'sxwa'j yu' walaiçxáa ũsa', Gedeon, Barak, Sansón, Jefxté, Davxid, Samwel, Dxus yuwe pta'sxsawe'sx txãawe'sxtxi we'wewa'j.

<sup>33</sup> Txãawe'sxa' Dxusa' pu'çxhina sũhwa'ja's ũuste ew jiiçxatx maaii yu' gweçxate puiiçxa knay, vxite' ewtxi jxkaahna fxi'ze, vxite' Dxus pu'çxni's jxpa'gatx, vxite' león yuwetxwa aphtxi,

<sup>34</sup> vxite' seena' ipx walajuwa çxhavxymeeta', vxite' ikhsa kusejuwa iyutx, vxite' puiiya' çxhãçxhameekwetewa kçxhãçxha'jnisa yuuçxa, gweçxate iiméh kuhsatxwa knaytxi.

<sup>35</sup> Naapkaçxha' u'ywe'sxwa txãawe'sx luuçx uunisatx ki' itxi vxitni jxpa'gatx. Vxite' seena' wala pkxuuni yuuçxa uutx, ki' itxi yu-uwa'ja's ji'phuçxa thaakwe ewte fxi'zeya' sũhçxa, nwe'wewa'j yu'sa' jxthãasmeeta'.

<sup>36</sup> Naapkaçxha' vxite' weeçxna peçxujkweçxa çam kadenaju tudçxa karcelte txaahnitx yuu.

<sup>37</sup> Vxite' kwet wãatatahçxa ikhnitx yuu. Maaii yu' pxãhsu pẽçnitx yuu. Vxite' iiméh seena' wala kxũusu'jni yuutx. Vxite' kçxilxuh ikhnitx yuu, naapkaçxha' vxite' ahçeçxa neeuni yat ji'phmeetx pekũhnaçxáa ũsu', kĩhwa ji'phmeeçxa piisxáa kha'tx kapla kha'tx txã'wěsaçxá's pã'çxçxa, nxuste pkxuunitx fxi'zena ũsu'.

<sup>38</sup> Txã'wě pkxuunisawe'sxa' nasa u'pnimée ki-

wesuçxáatx fxi'zena ũsu' yu'khsu, kiwe kafxsu. (Nasa txã'wẽ Dxus yakh zhiçxkwe fxi'zesa yakha' naa kiwe' ũsweçxte yuuwa meena.)

<sup>39</sup> Dxusa' pu'çxhina sũhwa'ja's ũuste ew jiiçxa txãawe'sx jxukaysa txã'wẽ seena' yũuni yuuçxawa, Dxus ũsya' neeyũuk txãa yu'sa' txa-gaçxhii yu' jxpa'gameeta',

<sup>40</sup> txãa pa'gatey Dxusa' thaakwe ewsane' ji'phu' açxh naa ensu kwe'sx jii yã'jçxa. Aça' txãawe'sxa' kwe'sx yakh ja'daçxah jxpa'gawa'jsaçxatx txagaçxhii yu' jxpa'gamée.

## 12

### *Jesukristo yuuçxá's yajkxna fxi'zega*

<sup>1</sup> Dxusa' pu'çxhina sũhwa'ja's ũuste yaakx-sawe'sx nakwe wala kuh ũsta' aça' kwe'sxa' txãawe'sx ksxavxyte ũstha'w. Txãa pa'ga pkal kaypuba'jwa'jsa's nvxihtna, kĩhwa Dxus yakh fxi'zewa'ja's suwwa'jsa yu'sa' jxuka nvxihtçxa, makwe thëytewa Dxus yakh yuuçxáa fxi'zega, uu entepkaçx.

<sup>2</sup> Jesukristo yuuçxá's pu'vxitumée yajkxna fxi'zega, txãa pa'gatey txãa yuuçxáak Dxusa' pu'çxhina sũhwa'ja's ũsu', sa' txãa yuuçxáak Dxusna yaakxni jxuka kxtey yuuna pa'phkaçx pu'çxhi'. Txã'wẽ yũuya'k Jesusa' thaamewa'j yu'sa' yajkxmée kluuste uu, txakwe wala nxus-nxustewa. Txãa pa'gatey pxthaa yuuni en skhëwniijũ' wët weçxana ũswa'ja's jiik yu', txãasak cielute Dxus ũsni pukate kaçx.

<sup>3</sup> Jesusa' nakwe wala pxthaa yuuk pkalsawe'sx kusete txã'sna i'kwe'sxa' yajkxçxa txãa na'wëy

nxuswa'j en pa'thewa Dxus tasxu txutemée mfxi'zewe.

<sup>4</sup> I'kwe'sxa' pkala's nvxihtçxa Dxus yakh fxi'zepa'ga iiméh seena' nxusnxus uuwa'j yu'sa' ji'phumey i'kwe.

<sup>5</sup> Sa' txakwe dud yu' peçxkanawa'jmeena Dxusa' txajx luuçxtxi's na'wêk yu'kxpeje' txã'sna:

Dxus yu'kxpehna kastigãyni's açenu, adx nçxi'k, Sa' juuna' we'wete', nxusna ũusçxanu.

<sup>6</sup> Txãa pa'gatey Dxusa' txajx peeygãanisatxi's yu'kxpeje'k ew fxi'zekahn,

Sa' txajx luuçx yuutxi's jxukaysatxku kastigaĩ' jĩ'k Dxus librute'.

<sup>7</sup> I'kwe'sxa' kastigãyni's mwantaĩwe, txãa pa'gatey Dxusa' i'kwe'sxtxi' txajx luuçx na'wêk jxpe'je'. Miiyajkxwe: ¿Maa luuçxçxá' ney yu'kxpehna kastigãynimeesa ũstxmanx?

<sup>8</sup> Dxusa' txajx luuçx yuutxi's jxukaysatxku yu'kxpehna kastigaĩ', nawa i'kwe'sxa' yu'kxpehna kastigãynimeesa yuuçxa', txajx luuçxmée vxitesate luuçxçxa txã'wê yuune'kwe.

<sup>9</sup> Kwe'sx le'çxkuēyte', naa kiwete kwe'sx tata yu'kxpehte', kxtey nwēese'je'tha'w na' açxha' wejx thaakwe ew nwēese'jwa'j ji'ptha'w kwe'sx Tata cielutewe'sxa's. Txã'wê nwēese'jçxa', pçumée ĩtxi fxi'zewa'ja's ji'phu'nja'w.

<sup>10</sup> Naa kiwete kwe'sx tatawe'sxa' txãawe'sx ũuste ma'wēne' wejx ew ũusuthe' yu'kxpehna jxpe'jwa'ja's txã'wēytxi yũuna jxpe'je', naa kiwete txaçxmée fxi'zewa'ja'sçxáawa. Nawa Dxusa' kwe'sxtxi iiméh wala selpiwa'ja's

kaapiya'jnak yu'kxpeje', txãawa ma'wẽ pkal ji'phmeena txã'wẽy yuukahn.

<sup>11</sup> Æçxh kastigãy ína yu' wala yuh akata', txãa pa'gatha'w jxpa'gaya' wa'lu'. Nawa txãa kastigo's jxpa'gaçxa ew fxi'zeya' piyate', wala yuh ewsa', jxpubamée weçxanak ya'fxi'ze' naa pa'ga.

*Dxus we'weni's weeçxa'mée mpa'yajkxwe*

<sup>12</sup> Txãa pa'ga wa'lmée çxhãçxha miijajkxwe, ewmeete fxi'zena ũsçxawa txãajũ mkaasehwe.

<sup>13</sup> Txã'wẽ yũuçxa', dxi'j ewsaju peena yu' jxpubameene'kwe.

<sup>14</sup> Jxukaysa yakh ew fxi'zewa'jçxá's pa'pçxuna meswe, pkalte fxi'zemée. Txã'wẽ pkalte fxi'zeçxa', kim yuhwa Dxusa's uyya' ãjameena.

<sup>15</sup> Dxus peeygãhçxa nwe'wenijũyã'ja', wala mpa'yajkxwe. Txã'wẽ jxpa'yajkçxa yuuçxáa i'kwe'sx maa yuhwa txã'wẽ vxitesatx kay-puba'jna ewmée yũusa yuumeene'kwe.

<sup>16</sup> Txã'wẽme', maái yu' ptammeesa kazx pkal yũuna fxi'zesa wáa yuune'kwe kíhwa ewsa's weeçna ahçena. Miijajkxwe Esaua' txã'wẽk ewsa's weeçsa yuu, teeçx ũ' plaatu pa'gaçxáa peekx wët fxi'zewa'ja's txweyku.

<sup>17</sup> I'kwe'sxa' peekx jiine'kwe Esaua' txã'wẽ yũuni e'su' ney bediciona's ki' jxpa'ga wëek, nawa ũsnimeek yuu. Aça' wala nxusna ũ'nek, nawa txajx txweyni's ma'wẽ yũuçxa yuhwa ki' kaasxwedu'jni yuume'.

<sup>18</sup> Israelwe'sxa' Sinaí thã'j vxiçte utxaatx kxte' ipx yuuçxáak seena' behna ũsu', sa' seena' yuh wala ũukhũukh çxhi'dxna ũsu'k kpi'sx we'weni na'wẽ susna.

19 Sa' korneta susni vxite' txãawe'sxtxi jxkaahna we'weni's wala ũukhçxa jwee yu' we'we kaahmeeta'.

20 Txãa jxkaahni' na'wëk yu': Maawa naa thã'the teeçx çxidaçxáawa txajana txã'sa' kwet wãatatahçxa meeçxawa we'thu yãjaçxa ikhwa'j yuuna, kîh tajkx ma'k yuu nawa jî'k.

21 Seena' yuh ũukhũukhsaçxáa vxyaana ũsu'k, txajiiçxáak Moises yuhwa na'jî: Ũukhnite yayanaçxáa ũsthu jî'k.

22 Nawa i'kwe'sxa' txã'wëstateçxáamée thaakwe seena'sa tasxte utxasáa i'kwe: Teeçx thã'j Sion yaasesate Dxus îtxisa ũsnite, cielute Jerusalen çxhabte, angeleswe'sx iiméh seena' kuhsa pkhaakheçxa Dxusa's tuuthe'jsawe'sx tasxte,

23 Dxus luuçx cielutewe'sx tasxte, Dxus nwe'wenisawe'sx tasxte, Dxus seena' juuna' jxukaysatx jxkaahsa tasxte,

24 Dxus u'se puutx we'weçxa nvxiitni's kxtey kxũ'ju'jwa'jsa Jesus tasxte, Abel ee na'wësamée Jesus ee pkawnisa' thaakwe ewstate txã'wësa tasxte utxasáa i'kwe.

25 Txãa pa'ga wala mpa'yajkxwe, kwe'sxtxi we'wesa cielujuwe'sxa's weeçxya'mée. Miiyajkxwe, Dxus jxkaahna we'weni Sinaíjũwe'sxçxá's weeçxçxawa iyumeeta', aça' kwe'sxa' wejx iyuya' ãjame'nja'w, cielujũ yuu we'weni's nwëese'jya' wa'lçxa'.

26 Dxus Sinaí thã'j vxiçte we'weni' naa kiwe's kēese'kh. Nawa ãçxha' txã'wëçxáamée na'jî'k: Ki' peena thaakwe kēese'je'nja nawa

kiweçxá'smée, petx cielu yã'jçxa kēese'je'nja jĩ'k.

<sup>27</sup> Isa ew jiyute yu', ki' peena thaakwe kēese'je'nja jĩçxa', Dxus vxitnisa ēsesa yu' jxuka ũsxitxna, aça' ēsesaméeçxáa neeyũutxna jĩçxane' txã'jĩ'.

<sup>28</sup> Nawa Dxus tasxte kwe'sx ũswa'j yu' kēese'jnimée yuuna. Txãa pa'ga Dxusa's weçxana neewe'wega, txajx dxi'pte ew yuuçxáa yũuna.

<sup>29</sup> Txã'wēme', kwe'sx Dxusa' jxuka ivxi-ituwa'jsa' ipx na'wēsa.

## 13

### *Dxusa's na'wē weçxana fxi'zewa'ja'*

<sup>1</sup> Teeçxsa na'wēçxah puutx peeygãhna fxi'zewa'ja's peçxkananuwe.

<sup>2</sup> I'kwe'sx yat-su pa'jsatx weçxana mpa'gawe. Txã'wē yũusa' maaiía' angeleswe'sx yuhtxwa jiyunimeete jxpaga'ta.

<sup>3</sup> Preesu ũssatx peeygãhna mfxi'zewe, i'kwe'sx yuu preesu ũssa na'wē yajkxna. Pkxuuni fxi'zesatxwa peeygãhna mfxi'zewe, kwe'sxwa kakwe ji'ptha'w na' naa kiwete txã'wēy pkxuuni yuuwa'jsatha'w sũhna miijajkxwe.

<sup>4</sup> Kabaçxa fxi'zeni' wala yuh ewsa', txãa pa'ga kabamey yu' pkal yũunuwe. Sa' kabayã'jçxa', vxitesa yakh pkal yũuna fxi'zewa'jme'. Txã'wēme', Dxusa' kastigaĩna txã'wē pkal yũusatxi'.

<sup>5</sup> Vxyuçxá's yajkxna fxi'zewa'jme'. Ma'wēkuē ji'phuni yakhçxáawa wēt mfxi'zewe, txãa

pa'gatey Dxus we'weçxa': Bagaçxte yuhwa i'kwe'sxçáa yuutxi'sa' nvxihtme'nja jĩ'k.

<sup>6</sup> Txãa pa'ga txãa yuuçxá's pi'kiga, kxtey pasyujuna sũhna na'jĩna:

Dxusa' kĩhtewa jxuka txãa yuuçxáak pu'çxhi',  
Txãa pa'ga weh yuhwa ũukhme'nja naa kiwete  
nasa ewmée yũusatxi'.

<sup>7</sup> Dxus yuwe pta'sxsa i'kwe'sxtxi jxpe'jsatx miiyajxwe: Txãawe'sx ma'wẽ ne'ta Dxusa's yajxna fxi'ze txã'wẽy mfxi'zewe.

<sup>8</sup> Jesukristo' bagaçxte yuhwa yu'pthehsame'. Nyafxiiwa ma'wẽsaga yu', sa' açxwa txãaíçxá', sa' bagaçxtewa txãaíçxáa nes yuuwa'jsa'.

<sup>9</sup> Txãa pa'ga i'kwe'sxa' fxiy kaapiya'jni's nwẽese'jna fxi'zenuwe, wejxwa Dxus peeygãaniçxá's ũuste jxpa'gaçxa çxhãçxha fxi'zeni ewsa', açã' ũ'nisu jxkaahnisa' bagaçxte yuhwa selpiwa'jsame' txã'wẽsatx nwẽese'jsawe'sxtxi's.

<sup>10</sup> I'kwe'sxa' ew miiyajxwe altal ji'ptha'w txã'sa'. Txãa altaltewe'sxa's ũ'we'çmeeta' kxtee selpisaawe'sxa'.

<sup>11</sup> Pkalsawe'sx ju'gu we'we pu'çxsa judiu' tajkx ikhnisa eea's Dxus yuuçxáa ũsni jĩnitek txa'jxa' jxũna u'jwe' jxukaysa pkaltxi peltunãyni yuukahn, nawa takx kakwe yuutxi'sa' txajũ jxũna u'jçxa ekajutx kabu'.

<sup>12</sup> Jesuswa txã'wẽyku çxhab ekaju kasehçxa uuna ũsu', txajx eeju nasaa pkaltxi' jxuka peltunãyya'.

<sup>13</sup> Txãa pa'ga kwe'sxwa Dxusna neewe'wena ũsni yat nyafxiiwe'sxa's nvxihtçxa, Jesus yakh



fxi'zeya' kasejega, txãawa ma'wẽga pxthaa yuu txã'wẽy yaaçeni yuuya'.

14 Kwe'sxa' nyafxii ũsni yata's nvxihtçxa, çxhab bagaçxte yuhwa pçuwa'jsamée ũsna txã'sna pakwena ũstha'w, naa kiwete' bagaçxte yuhwa pçuwa'jsamée çxhab ji'phmeetha'w naa pa'ga.

15 Txãa pa'ga Dxusa's tuuthe'jna nes yu-uwa'j ji'ptha'w Jesukristo's pi'kxçxa bagaçxtewa. Dxusa's weçxana tajkx ikhçxa kabupkaçxte, kwe'sx ũsuh jxuka yajkxçxa txajx yase's kx-susna weçxana nes yuuwa'j ji'ptha'w.

16 Txã'wẽ yũusa' kīhçxáawa i'kwe'sx ji'phuni's vxitesatx jtxuhdena fxi'zewa'ja's peçxkananuwe, txãa pa'gatey txã'wẽ yũuni'sku Dxusa' weçxá'.

17 Sa' i'kwe'stxi kaapiya'jna jxpe'jsatxi's kxtey yuuna mwẽese'jwe, txãa pa'gatey txãawe'sxa' i'kwe'sx ũustxi vxituwe'sxte thegsata'. Txãawe'sxa' cielute Dxus tasxte utxaaçxa pta'sxwa'j ji'phta', txãasatx txã'wẽ yũ'. Aça' txãawe'sx mjĩini's weeçxa na'wẽ yuunuwe, ewçxáa yũuwa'ja's mpa'pçxuwe. Txã'wẽ yũumeete', txãawe'sx mjĩini' i'kwe'stxi's kīhte yuhwa selpiimeena.

18 Kīhtewa ewçxáa fxi'ze wẽeçxa bagaçxte yuhwa pkalte yu' fxi'zesameetha'w, naa pa'ga kwe'sx pa'gate Dxus yakh mpuutxwe'wewe.

19 I'kwe'stxi's Dxus yakh puutx we'we jxpi'ki'th, kxah Dxusa' adxa's txaçxmeyna ki' kaasxwedu'juna i'kwe'sx yakh ũsya'.

*Yuwe weçxaa kaahni*

<sup>20</sup> Jesukristo' iiméh ew txajx nasatx jxpe'jsa yu'k, txajx eek txã'wẽ u'se puutx we'weni bagaçxte yuhwa yu'pthehwa'jme's vxitçxa nvxi-itni's kxtey kxũ'ju'jwa'jsa yuu.

<sup>21</sup> Sa' Jesukristo uutewa ki' itxi vxit-sa Dxusa' i'kwe'sxtxi's kĩhte yuhwa peejxmée ewçxáa kaafxi'ze'jena, txajx jxthãasni's kxtey yuukahn. Sa' txã' i'kwe'sxtxi ma'wẽ yuuweçxtewa kxtey yuuna, Jesukristo pu'çxte txajx dxi'pte ew yũusa yu's. Jesukristo yuuçxáa bagaçxtewa jxtuhthesa yuuna.

<sup>22</sup> Yakhthě'jwe'sxtxi neewe'we'th, wa'lmée jxpa'gakahn maz yuwe jxu'jmeekuẽ yu'kxpehna fxi'jni's.

<sup>23</sup> Sa' pta'sxiçthu kwe'sx yakhthě'j Timoteo' karceluh txhweteni yã'j ũsa', sa' dud wáa pa'jana, aç'a' pe'jçxa yuwe'nja i'kwe'sxtxi puutx uyya' yuhçxa'.

<sup>24</sup> Dxuus yatte i'kwe'sxtxi jxpe'jsawe'sxtxi' jxukaysatx yuwe meen weçxawe, sa' Dxus yakh fxi'zesawe'sxtxiwa txã'wěy. Italiajũwe'sxwa yuwe weçxaa kaja'tx.

<sup>25</sup> I'kwe'sx jxukaysatx Dxusa' pu'çxna nes yu-una.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

06da09f4-8d0f-5001-ae8c-0e6aa0131ffd